

警濤舫語



岳麓诗社湘乡分社
湘乡市地方志办公室

前 言

我市词苑前辈刘海寰先生四十年代刊印之词集《惊涛舷语》，共收词作二十四阕，均写于甲申闰四月至乙酉八月，记湘乡沦陷时，先生所历乱离事也。其颠沛之状，见于行间；爱国之情，溢于言表。读者手披心动，有如亲历身受。惜乎年深日久，复历劫罹灾，原集已不可再得。

前事不忘，后事之师。值兹“七·七”事变五十周年，为追维往事，启迪来者，亦有助于繁荣诗词创作，经征得先生同意，就记忆所及，得十八阕，并原集序跋，重新刊印，仍题为《惊涛舷语》，作为内部发行，以资纪念。

岳麓诗社湘乡分社 李煥黄撰

一九八七年六月十五日

序

缘情之作，非具性情之真者不能工，尤非得性情之正者不能极其工。湘乡刘君海擎，余之盟弟也。长身玉立，风采俊逸；博览群书，雅好填词。往常见其所为《超海楼长短句》，出入小山、玉田间，缠绵悱恻，情韵不匮；然余不独心赏其词，且深敬其为人。

溯自倭寇犯湘，余奉父母避地涟滨，假馆君家。所以款接之者，无微不至。先太史公常极称之，命余及妹婿王君汉农，与结兄弟盟：余年长，为兄；汉农次之；君最少，殿焉。

癸未冬，先继慈杨太夫人见背，君为经纪其丧。甲申夏五，寇至龙城，先太史公以不屈殉国。君时遁走荒山，为词六阙以哭，语绝痛。

今岁，倭寇投降，君返里第。海内知识，欲得君踪迹者，投函盈尺；君因出乱中所为词若干阙，颜曰：《惊涛舷语》，拟付印以为饷。始甲申闰四月，迄乙酉八月，乱中踪迹备著；以视前作，尤为得性情之真且正焉。盖君具性情之真者，资稟之厚也；得性情之正者，诗书之泽也。读者当自求之词中而必不河汉余言已。

乙酉十月之望 长沙郑小从

水调歌头

甲申四月二十七日，于混乱中走大山冲左家湾，是为流亡之始。

从此善愁者，不必吊杨花，杨花纵是飘荡，犹不到天涯。惟有流亡人去，飘荡不知何许，况味最堪嗟。回首望霜板，烽火夕阳斜。

古城阴，新堞外，暗尘沙。忍见喋血孤旅，辛苦斗长蛇。话到惊心风雨，梦醒还疑是梦，客泪落悲笳。万事何须问，王粲已无家。

台 城 路

五月初四，大山冲卷入骇浪中，遂由左家湾迁至附近一小茅屋名长托者。夜不能寐，凄吟成调。

惊飞燕子巢无定，哀哀丧家群羽。背岭穷崖，拖茅败屋，又得一宵栖处。乱萍飘絮。更莫问来朝，寄魂何许。且检余粮，草间偷汲冷泉煮。

遥边笳语互起，半规斜月外，相和凄苦。风树疑人，山泉幻鬼，合造虚惊无数。乌衣旧路，任豕突狼嚎，千村焦土。睡不成眠，但期天早曙。

台 城 路

五月初八，局势益危，居停有辞客意，乃与家人冒敌机炮火，越望岳峰而至九峰山，途中所历，词以写之。

西风不庇寒蝉梦，危柯乱吹不住。恶鸟嘶云，疯雷喷铁，欲避浑疑无路。斜阳渐暮。送鳝径衔枚，越山人去。似避离群，野鹃啼向谷中树。

松间磷火上下，冷萤三五点，相引前路。倦屣攀崖，尘衫掠棘，绝壁暗中飞渡。残魂在否。又一羽摩空，啸声来暮。炸破沉冥，夜烧谁院宇。

台 城 路

五月初十，寇大至，进踞巴江，九峰距巴江里许，遂又不可复居，于是黑夜冒雨，翻山而逃，抵九峰后山布袋冲时，天已明矣。岐路惊弓，一时同感。

酒边多少如虹气，而今可怜无几。弹海浮鸥，刀林堕燕，惊换几番身世。雄怀倦矣。对峭浪尖风，梦中犹悸。水竭山穷，者回行到尽头未？

长林不断夜雨，冷蒙频扑面，都是愁泪。风送流萤，虫喧乱草，写澈人间悲意。幽篁径尾。报一线微芒，曙村初霁。雾隐遥山，裂天长笛起。

临 江 仙

五月十八日，登九峰山頂何仙祠，望見县城火光烛天，涟水奔流其下，寂无帆檣，不觉泪下，时故乡沦陷已兼旬矣。

仙子祠堂高绝处，画图遥展魂惊。冷
潮流恨去无声。断笳吹落日，野火葬孤城。

家恨国仇何日了，沉沦可奈苍生。高
冠嗟尔庙堂卿。可怜迁客泪，空吊战场
兵。

采桑子

五月晦日，潜至霜板，一带村庐，不闻鸡犬，百年亭馆，惟见榛莱。少陵“寥落、流离”之句，深有怆于予怀也。用小山韵以写吾哀。

当时歌哭行吟地，白日闲闲，碧野朱栏，一夜风吹旧梦残。

砧声人语知何许，土裂田干，满眼荒寒，留与愁人忍泪看。

八 声 甘 州

由布袋冲循径而南，为马蹄寨，颇有萦纡之胜。转折出林，则涟水龙城皆可手指。余尝踏竹柏影独往听九峰晚钟，用梦窗韵制此坐石上歌之，几令满山猿鹤，皆生凄唳。

散空明点点是愁痕，千山耀寒星。倚苍崖望极。没莱荒陇，颓壁残城。故国抱洲芳水，浪卷雪花腥。吊尽沧桑去，落日无声。

一角溪山自好，奈殊乡倦客，泪眼难醒。叹年时踪迹，蓬发欲消青。几伤心、寺门钟语，挟片云、卷恨落遥汀。斜阳外，渐牛羊下，一径秋平。

八 声 甘 州

庚辰（一九四〇）八月十五，予与拱明夜游南岳，夜半，乘皓月穿云而下，宿铁佛寺。平生壮游，每追念之。今夕何夕，乃独于荒山中对此孤月，怀往伤情，尤念吾拱明也。

望归云天末故人心，今宵思悠悠。正家山杳邈，烽火紧急，人去穷陬。坠叶西风不了，破屋乱鸣愁。无酒无诗夜，如此中秋。

多少前欢照眼，只同欢人远，欲说还休。问如今南岳，好月为谁留。饱雄风、太空无恙，我念君、铁鸟渡瀛洲。君念我，在惊涛里，断桨危舟。

注：拱明姓陈氏，空军少校）时转战于沿海一带，一九四六年，机坠于杭州笕桥，殉焉。

鹄 踏 枝

筠园盟伯郑太史挽词。

太史讳家溉，字从耘，长沙人，光緒癸卯（一九〇三）翰林，书名满天下。甲申（一九四四）五月初七日，为倭寇所执，不屈，被戕于湘乡东南郊之黄泥陇池上，春秋七十有二。

其 一

一刹妖风吹浪立。打入山城，万户悲流徙。风鹤弓蛇惊未已，摧心又报文星坠。

是幻是真浑梦里。不信诗翁，真个骑鲸逝。独对残灯飘冷泪，凄清旧事如泉起。

其 二

记得逃秦来远楫。穷谷园林，兼岁留

词杰。浪说桃源尘可绝，如今一例罹奇劫。

独有公灵磨不灭。人去楼空，犹保题楼帖。点画当时夸峭拔，细看都是冲冠发。

其 三

记得年时随杖履。曾与郎君，共设金兰誓。苏氏长公元献婿，一时把臂成昆季。（注：见郑小从序。）

拙钝每劳相挈掖，推毂殷勤，得侍随园几。今日追思余一悔，深恩负尽垂青意。（注：蒙公引掖，擎得请业于邓瑾珊夫子之门。）

其 四

记得登楼曾作赋。白发流民（注：公登望南庵吊郭天民先生诗，有“白发流民惭后死，青山旧主忆先生”之句），不负当年句。鼎镬如

饴身似羽，知公此日堂堂去。

莫望马塍花发处。黄土埋忠，旧是逃秦所。明月清风长万古，黄泥陇上横塘路。

其 五

长路漫漫烽火里。忠骨天涯，何日营归计。最苦家山风雨际，有人犹望平安字。一别严君成隔世，堂下群贤，抱恨何时已。便做洞庭千顷水，可能敌得思亲泪。

其 六

故国何须伤变乱。见说来年，便作黄龙宴。一事伤心公已远，太平钟鼓无由见。

汉室雄师夸劲健。除虎擒黑，直到降书献。待缚元凶归楚甸，与公着意营斋奠。

西 江 月

九月二十六日，黄泥洞口看秋霁，忆城中浅斟低唱之欢，正去年此时也。

向晚冲滩水急，横空扫叶风斜。阵云拖雨过前畬，多半明朝还下。

佐酒已无歌吹，撩人惟有寒笳。心中多少旧繁华，难觅旧人同话。

摸 鱼 儿

秋暮矣，寄此为故乡鱼鸟问

渐巴江、草枯沙冷，萧萧秋已如许。林泉到此都憔悴，那更去乡羁旅。秋且住。莫再把、凄凉皴点霜桥树。当年旧路，任废屋阴磷，荒邱战骨，写遍断肠句。

还乡曲，唱到而今总误。溪山今是谁主。凭谁寄与西风语，还我旧时鸥鹭。凝望处，又落木、衰烟冉冉千山暮。离情最苦。恨天际归鸦，载愁不去，空载落霞去。

一 萼 红

“天寒日暮山谷里、中原无书归不得。”

—杜甫—

对荒郊。又岁华惊晚，狂雪舞亭皋。
古庙笼寒，颓云酿暝，人迹不度溪桥。剩
空际、饥鹰倦羽，绕枯林、一抹写萧条。闪壁
灯昏，温诗酒冷，情绪无聊。

避地依然沧海，纵青衫无恙，总觉魂
销。故国蒙尘，坠欢如梦，往时鸥鹭难
招。九峰外、雄流在否，盼春来、为我送归
桡。漫想薰风两岸，凯唱云霄。